



«Il Palantin» en la Reichsgasse a Cuira.

MAD

La libreria rumantscha «Il Palantin» serra las portas

■ (cp) Cun la fin da l'onn ha surdà la librarista Elisabeth Maranta dal «Palantin» en la Reichsgasse a Cuira, gist visavi l'hotel Stern, ses sortiment a la libreria Proveni Berther. «Il Palantin» serra las portas en il decurs da l'onn nov. Questa libreria è vegnida iniziada da la Lia Rumantscha l'entschatta dals onns 1990. I gieva lezza giada per preschentar cudeschs rumantschs ed infurmaziuns en vitrina e stizun en in lieu nua che scolaras e scolaras da la scola chantunala, politichers, visitadras da la biblioteca e da l'archiv chantunal e bler'otra glied interessada per cudeschs passan di per di. Quai n'era da lez temp e n'è er oz betg il cas en la Via Plessur in pau isolada nua che la Lia Rumantscha ha sia sedia.

En discussiun da la LR cun l'emprima manadra da la libreria, la giuvna *Maria Riatsch*, ha la libreria survegni il num «Il Palantin», in term ladin cun ina ragisch ch'i dat er en las autras regiuns en il pled «palentada» (Offenbarung) e «palentar». Da l'entschatta davent ha la libreria stui finanziar sa sezza – cun ina pitschna contribuziun da la LR per il local. L'offerta sa concentrava sin cudeschs rumantschs ed infurmaziuns. Il 1993 surpiglia *Elisabeth Maranta*, ina librarista professiunala e passiuada, la libreria e schlargia l'offerta, l'emprim cun cudeschs en las linguas romanas,

pli tard er cun ediziuns tudestgas. Elisabeth Maranta na saveva betg rumantsch, ma era fitg bain infurmada, interessada per dumondas da lingua ed ina vendidra da cudeschs singulara. Cun ella è il Palantin daventà in lieu da sentupada e cumpra per tut tgi che tschertgava cudeschs rumantschs ed interessantas publicaziuns a Cuira. Er giasts da tut il mund che visitavan il «Stern» e la citad veglia da Cuira eran fascinads da questa simpatica libreria cun si'offerta unica. Durant 25 onns ha Maranta vendì cudeschs e dà infurmaziuns a Rumantschs, Grischuns e Svizzers da tuttas regiuns, a glied da l'entir'Europa, gea da l'entir mund. Uschia ha ella realisà la finamira dal «Palantin» da far palais ch'il rumantsch exista e viva e ch'i dat en questa lingua ina bella retscha d'ediziuns che valan la paina da vegnir legidas e che sa preschentan fitg bain er sper ediziuns da grondas linguas.

Suenter 25 onns e cun passa 80 prenda Maranta per la fin da l'onn cumià da sia libreria. Ses engaschi, sia cordialità e ses gust da discurren da cudeschs e scopertas libraristicas restan en la meglra memoria. «Il Palantin» vegn a mancar, surtut a la Rumantschia che perda in lieu da forza e da radiazion ch'ella savess duvrar oz pli che mai. Er la meglra preschientscha sin internet na po betg cumpensar questa perdita.